



IROMAG

Odlazni studenti



U OVOM BROJU

**49. GODIŠNJICA
UNIVERZITETA**

ERASMUS INFO DAN

**MEĐUNARODNI DAN ŽENA:
RAZGOVOR S REKTORICOM**

**LJETNA ŠKOLA EDUGAME
– 2026**

**LEARNING TO KNOW
EUROPEAN SPORTS
CULTURES**

**POSJETE MATURANATA
MAŠINSKOM FAKULTETU**

by IROUNMO

Program obilježavanja 49. godišnjice Univerziteta započeo je svečanim prijemom penzionisanih zaposlenika, čime je odata počast onima koji su svojim dugogodišnjim radom doprinijeli razvoju i ugledu Univerziteta.

Svečani prijem održan je u amfiteatru Ekonomskog fakulteta. Prisutnima se obratila rektorica prof. dr. Alena Huseinbegović, naglasivši da Univerzitet predstavlja rezultat decenija kontinuiranog rada, jasne vizije i posvećenosti svih koji su bili dio njegove akademske zajednice.

U nastavku programa, menadžment Univerziteta položio je cvijeće na spomen-bistu Džemala Bijedića, kao i na spomen-obilježje Mirsada Hujdura Hujke i saboraca, odajući počast njihovom značaju i doprinosu. Nakon toga upriličeno je zajedničko druženje uz ručak sa penzionisanim zaposlenicima.

ERASMUS INFO DAN

By IROUNMO

Erasmus Info dan održan je 17. marta 2026. godine od 12:30 do 13:30 sati na Fakultetu humanističkih nauka Univerziteta Džemal Bijedić u Mostaru. Info dan je počeo uvodnim obraćanjem Prorektora za međunarodnu saradnju. Prisutni su prvo mogli vidjeti video Kancelarije za međunarodnu saradnju o proceduri nominacije na Univerzitetu Džemal Bijedić u Mostaru. Studenti koji su već bili na mobilnosti predstavili su svoja iskustva i na što treba obratiti pažnju prilikom nominacije. Završna poruka Lane Hadžiabulić i Tarika Kreso bila je da je mobilnost neprocijenjivo iskustvo i da se studenti ne treba da plaše odlaska na mobilnost, čak i u situacijama kada je samo jedan student novimovan sa Univerzieteta. Odgovorali su na pitanja u vezi sa svojim iskustvom i preporučili na što treba obratiti pažnju prilikom prijave, kao i tokom mobilnosti. Prisutni studenti i osoblje su također imali su priliku pogledati video o iskustvu Adnana Turajlića, Šejle Grčić i Mirze Bajramović, studenata koji su trenutno na mobilnosti, kao i Ide Tursić, studentice koja svoju mobilnost ostvarila u akademskoj 2024/25.

Erasmus info dan je organizovan u okviru Erasmus+ CBHE projekta ESN-AIR - "Uključivanje studenata za unapređenje praksi internacionalizacije u jadransko-jonskoj regiji".



MEĐUNARODNI DAN ŽENA: RAZGOVOR S REKTORICOM

By IROUNMO

Povodom obilježavanja 8. marta, Međunarodnog dana žena, 12. 3. 2026. godine u prostorijama Univerzitetske biblioteke upriličen je razgovor s rektoricom Univerziteta, prof. dr. Alenom Huseinbegović. Razgovor je bio posvećen njenom profesionalnom putu i iskustvu u akademskoj zajednici. Tokom susreta rektorica je govorila o svom obrazovnom i profesionalnom razvoju na Univerzitetu. Posebno je istakla izazove s kojima se susretala tokom akademske karijere, kao i važnost kontinuiranog obrazovanja, rada i posvećenosti. U obraćanju studentima naglasila je značaj stalnog učenja, postavljanja ciljeva i korištenja prilika koje se pružaju tokom studiranja. U okviru obilježavanja Međunarodnog dana žena organizovana je i izložba doktorskih disertacija doktorantica koje su svoje doktorske radove odbranile na Univerzitetu u periodu od 1997. do 2025. godine. U navedenom periodu doktoriralo je ukupno 270 kandidata, od čega je 100 žena. Tokom ove godine na Univerzitetu je promovirana i stota doktorica nauka.



LJETNA ŠKOLA EDUGAME – 2026

By IROUNMO

Druga ljetna škola Erasmus+ projekta EduGAME, pod nazivom „VR Story Design Challenge“, okupila je više od 150 studenata iz Bosne i Hercegovine i inostranstva, a održana je od 23. do 27. marta 2026. godine na Univerzitetu „Džemal Bijedić“ u Mostaru. Tokom petodnevnog programa, više od 100 studenata sa Univerziteta „Džemal Bijedić“ u Mostaru i preko 50 međunarodnih učesnika prisustvovalo je u predavanjima i učestvovalo u radionicama, mentorskim sesijama i timskom radu na projektima. Program je obuhvatio teme iz oblasti dizajna igara, rodne zastupljenosti u edukativnim igrama te primjene umjetne inteligencije u obrazovanju. Centralni događaj Ljetne škole bio je EducaThon: „VR Story Design Challenge“, u okviru kojeg su studenti, radeći u timovima i uz podršku mentora, razvijali rješenja za pripovijedanje u virtualnoj stvarnosti. Pored akademskih aktivnosti, učesnici su imali priliku upoznati kulturno-historijske znamenitosti Mostara. Ljetna škola završena je prezentacijom studentskih projekata, dodjelom nagrada i ceremonijom uručjenja certifikata.

prvo mjesto: Tim 1 Univerziteta „Džemal Bijedić“ u Mostaru

drugo mjesto dijele: Tim 2 Univerziteta „Džemal Bijedić“ u Mostaru i Univerzitet u Bijaću

treće mjesto dijele: Tim studenata Univerziteta u Tirani i Univerziteta u Sousseu



LEARNING TO KNOW EUROPEAN SPORTS CULTURES

By IROUNMO

U okviru ERASMUS+ Blended Intensive Programme (BIP) „Learning to Know European Sports Cultures“, studenti i nastavno osoblje Univerziteta „Džemal Bijedić“ u Mostaru učestvovali su u dvodijelnoj mobilnosti realizovanoj u saradnji sa Univerzitetom Saarland (Njemačka). Prva faza programa održana je u periodu od 23. do 27. februara 2026. godine na Univerzitetu Saarland, gdje su studenti Stela, Faris, Emrah, Dino, Emre i Tarik sa Odsjeka za sport i zdravlje Nastavničkog fakulteta, zajedno sa prorektorom za međunarodnu i međuuniverzitetsku saradnju prof. dr. Rijadom Novakovićem i v. ass. Amelom Jazvinom, imali priliku upoznati njemačku sportsku kulturu. Kroz predavanja i praktične aktivnosti učesnici su stekli uvid u sistem razvoja elitnog i školskog sporta u Njemačkoj, a program je dodatno obogaćen posjetom olimpijskom trening centru, gdje su razgovarali sa direktorom centra i vrhunskim sportistima. Druga faza programa realizovana je u Mostaru u periodu od 9. do 13. marta 2026. godine, kada je Univerzitet „Džemal Bijedić“ ugostio studente i osoblje sa Univerziteta Saarland. Tokom ove faze učesnici su imali priliku upoznati sistem sporta u Bosni i Hercegovini, njegovu organizaciju, izazove i razvojne mogućnosti. Poseban fokus bio je na razmjeni iskustava, interkulturalnom učenju te jačanju saradnje između studenata i nastavnog osoblja. Ova mobilnost značajno doprinosi jačanju međunarodne saradnje, razmjeni znanja i promociji sporta kao važnog segmenta evropskog identiteta.





POSJETE MATURANATA MAŠINSKOM FAKULTETU

By IROUNMO

U periodu od 13. do 26. marta 2026. godine, Mašinski fakultet je realizovao niz aktivnosti usmjerenih na promociju studijskih programa i saradnju sa srednjim školama. U petak, 13.03.2026. godine, predstavnici Fakulteta posjetili su JU Srednju elektrotehničku školu „Salih-Salko Ćurić“ u Mostaru, gdje su maturantima predstavili studijske programe prvog ciklusa studija, s posebnim naglaskom na novi studijski program Elektrotehnika. Nakon toga, u srijedu, 25.03.2026. godine, Mašinski fakultet je ugostio maturante Gimnazije Mostar, koji su u pratnji profesorice imali priliku upoznati se sa studijskim programima Mašinstvo i Elektrotehnika. Tokom posjete, profesori i asistenti su učenicima predstavili način izvođenja nastave, dostupna usmjerenja, kao i mogućnosti zapošljavanja nakon završetka studija. Učenici su obišli laboratorije Instituta za mašinstvo, gdje se realizuje praktični dio nastave, te su upoznati i sa vannastavnim aktivnostima, različitim obukama i takmičenjima, kao i programima razmjene koji omogućavaju boravak na evropskim univerzitetima. Slična posjeta realizovana je i u četvrtak, 26.03.2026. godine, kada su Mašinski fakultet posjetili maturanti JU Srednje mašinsko-saobraćajne škole Mostar zajedno sa svojim profesorima.



IROMAG



/iro.unmo



@iro.unmo



/iro.unmo

IROMAG TEAM
MIRSADA BEHRAM
LEJLA ŠKALJIĆ
AMILA VRTIĆ

